

## 對使焚鉢

宋，慧璉，漳州人。皇祐中，召對化城殿稱旨，賜號大覺禪師。璉持律甚嚴，上嘗遣使賜龍腦鉢盂，璉對使焚之曰：「吾法以壞色衣，以瓦鉢食；此鉢非法，宜無所用。」使回奏，上嘉歎久之。

贊曰：璉公煅鉢而無怖心，英祖聞奏而無怒色，所謂「微先生不能成光武之大，微光武不能遂先生之高」者也，得非宗門之盛事歟？

## 總論

上錄忠君，此紀高尚。高尚是，則忠君者非歟？是不然，顧所守何如耳！道充於巖穴，而名聞於廊廟，上度吾君，下度吾民，非弘法利生之正務乎！獨惜大道不立，而枉己以求榮者，貽釋子之羞也！噫！為僧者誠以道自重，使國王大臣聞天下有樂道忘勢之僧，而歎之羨之，其忠亦多矣！豈必面陳獻替而後為忠乎？吾是以知南陽籠逮七朝，無業力辭三詔，遇不同，而其道同，其忠同。